

大家好，我係何二仔，係榕樹澳有漁排。現在漁護署提出要求我們漁民要養七成魚，真係對我們好唔公平，令我們養魚界全香港 26 個養魚區都非常反感。因為署方完全漠視咗海魚養殖行業的經營情況越來越困難，全球氣候暖化、海洋污染、極端天氣等問題都令行業隨時面對大量死魚、漁排損毀、生財工具盡失、血本無歸的風險。

過去十多年來，署方完全沒有正視過香港水域的水質越來越差的問題，只係講一路都有做監測水質的工作，但事實係我地年年死魚，漁護署就完全冇理過我地。近呢二十年，香港和鄰近地區都不停有填海同大型基建工程，啲污染物就隨住水流四圍漂，未來，「明日大嶼」仲會有大規模填海，咁香港海域的水質就只會越來越差，死魚會越來越多。而家漁護署又強迫我地要養七成魚，咁到時死魚政府係咪會賠足錢俾我地先？

另外，漁護署話有監測水質，有監測紅潮，咁含氧量又有冇監測呢？每年六、七、八月，水的含氧量都會偏低，咁啲魚缺氧死晒又點呢？漁護署有好多專家，但我相信佢地連魚有幾多種病都唔知，有壺菌、食肉菌、青光眼、肝病、鰓虫五種常見病，但漁護署就從來都有提供藥物去幫我地啲魚醫病。如果啲魚一中病，就會好快傳染晒俾其他魚，2-3 日就可以所有魚死晒，但係漁護署就一啲支援都有俾到我地。

就算呢兩年成日打大風，又天鴿、又山竹，好多漁排有不同程度的損毀，又死咗好多魚，漁護署話就話有個什麼緊急援助基金去幫我地解決難關，但幾十萬的損失往往只獲賠償幾千元，甚至幾百元。請問政府有冇幫過我地？

所以，漁護署唔該你唔好口口聲聲話幫我地做咗好多嘢，幫我地什麼持續發展；其實，你地只係對我地諸多要求，迫我地放棄養魚。